

元明史料叢編 第三輯

元

卷二十

(清·宣統三年層漪堂刊本)

書 (六)

清·曾濂撰

文海出版社
有限公司
印行

元書卷七十三

邵陽曾廉譔

旭邁傑倒刺沙苔失帖木兒兀伯都刺月魯帖木兒鐵木哥馬札兒台囊加台列傳第四十八

旭邁傑亦曰旭滅傑失其氏族初事泰定帝於晉邸以嚴見憚至治之末御史大夫鐵失將謀逆遣幹羅思以其事告倒刺沙曰無使旭邁傑得聞也泰定帝卽位旭邁傑爲宣政院使尋知樞密院事遂拜右丞相兼阿速衛達魯花赤帝之討諸逆也旭邁傑實馳至上都誅鐵失苔失兒赤因帖木兒脫火赤章台等竝戮其子孫而籍其產旭邁傑又言諸宗王能自拔逆黨盡忠朝廷者惟有買奴請加封賞以示激勸買奴由是得封爲泰甯王泰定元年災異屢見御史上言宰相宜避位以應天變御史大夫禿忽魯因先乞

退而中書諸臣元伯都刺張珪楊廷玉遂皆抗疏乞罷於是旭邁
傑及左丞相倒刺沙言比者上天示警陛下以憂天下爲心反躬
自責脩德慎行臣等才識庸庸當國大任無所贊襄以致於此罪
宜黜退非關諸臣也帝並不許二年旭邁傑請減廩馬汰衛士及
節諸王濫賜復以歲餼請罷皇后上都營繕皆從之是歲薨旭邁
傑雖果毅而夙無公輔望惟以恩舊致位右地先朝耆臣多嫌其
蠟進故皆退避欲以動之旭邁傑不得已始乞策免非本懷也然
贊帝分別忠姦能申明大義正名討賊旭邁傑有力焉又務守法
度期安元元以裁減尤費爲人所疾而衛士殺人於桓州及蒙古
千戶奪朱甲妻女旭邁傑頗庇之遂大致人言以此爲損焉

倒刺沙回回人也兄曰馬某沙武宗初爲拱衛直都指揮使以角
觝屢勝遙授平章政事久之爲湖廣右丞而倒刺沙事晉王爲內

史晉王甚信任之倒刺沙乃以其子合散事丞相拜住得入宿衛以刺探朝廷事既而合散歸言御史大夫鐵失與拜住忤恐有事變未幾鐵失逆謀已定遣幹羅思來告晉王竝以告倒刺沙晉王囚幹羅思而上變不及俄而立爲皇帝遂以倒刺沙平章政事馬某沙知樞密院事尋以討賊功進倒刺沙爲左丞相馬某沙爲御史大夫秦定元年開經筵倒刺沙與平章政事張珪同領經筵事明年改御史大夫逾月復爲左丞相加開府儀同三司錄軍國重事是時旭邁傑薨倒刺沙以回回不得爲首輔於是知樞密院事荅失帖木兒代爲右丞相然事多決於倒刺沙其歲馬某沙復加開府儀同三司兄弟竝偏蒙厚寵矣三年倒刺沙及省臣同言郡縣旱蝗良由臣等不能調變今當恐懼儆省亦冀陛下敬身修德憫恤生民又言國用不繼陛下當法祖宗之勤儉以爲永圖臣等

在職苟有濫承恩賞者必不惜回奏又以賜大天源延聖寺田千頃上言養給軍民必資地力世祖建大宣文宏教等寺賜之永業當時已號虛費成宗復造天壽萬甯寺用倍之武宗有崇恩福元仁宗有承華普慶租樵所入抑又甚焉英宗鑿山開寺損兵傷農而卒無益夫土地祖宗所有子孫當共惜之臣恐茲後藉爲口實妄興工役邀福利以逞私欲也惟陛下察之帝皆嘉納焉然倒刺沙實庸鄙無器局多私其親黨行不能如所言又以得君輒自作威福御史臺逮參知政事楊廷玉倒刺沙助廷玉欲陷御史賴張起巖三上章爭之乃解事在起巖傳由是政多不平而帝益禮顧之四年江南旱蝗倒刺沙及省臣求解職帝皆不許皇子八的麻亦兒監卜爲晉王晉龍潛號也地臨邊多事而王幼乃以荅失帖木兒倒刺沙領內史府四幹耳朵事藉以重之然倒刺沙亦自知

爲人所疾致和元年與蒼失帖木兒言災異由諸罪廢官怨怩所致請量才錄用苟欲以消怨蒙古人尤讎視之無何帝崩於上都倒刺沙與梁王王禪遼王脫脫及蒼失帖木兒奉遺詔其輔少主踰月天順帝立會同僉樞密院事燕鐵木兒反納懷王於大都以拒天子因指名倒刺沙兀伯都刺爲姦臣於是倒刺沙卽殺諸王滿禿阿馬刺台等十八人以絕內應而與諸王王禪大臣蒼失帖木兒等大發兵共出征討旣而王師屢敗於昌平倒刺沙無大略諸王大將不相統一多洩戰無所明功罪然諸路勤王之師東西皆至大都南逼汴梁皆忠勇奮發事幾濟而齊王月魯帖木兒以兵自遼北襲上都倒刺沙兵皆付他將不能禦上都遂陷天子崩遼王脫脫及難倒刺沙被禽至燕及其子潑皮木八刺沙皆見殺倒刺沙磔尸於市馬某沙亦死皆追理其家資天祿二年翰林國

史院言纂修英宗實錄請具倒刺沙款伏狀付史館從之蓋欲坐倒刺沙通逆謀以歸惡秦定也

荅失帖木兒不知其氏族或又稱爲駙馬亦不知其尙何王女也荅失帖木兒自仁宗初知樞密院事尋以黨於脫虎脫三寶奴中書奏用參知河南政事御史以其挾勢害民奏罷久之爲西臺御史大夫英宗初復知樞密院事封薊國公秦定時拜右丞相開府儀同三司上柱國錄軍國重事帝崩以首輔受顧命貳於文宗文宗以爲知樞密院事天祿二年御史言付之兵柄非便詔罷其職未幾起爲江浙左丞相元統二年入爲太禧院使議軍國重事至正時拜遼陽左丞相御史烏古孫良楨上疏曰荅失帖木兒昔事晉邸位百僚上受任託孤乃陰蓄二心南至紅橋逗留不進致干敗亡覲面入降反藉口矜爲己功視楚之丁公罪又甚焉天祿

初又復賄賂權門流毒江浙今仍移治遼陽夫賣君賣國之臣設使已死猶宜追討况久逭天誅稽國法邪正不辯恐姦賊接迹非國家之福也詔卽奪其官爵時人以良楨爲直筆焉其時出征死者梁王王禪湘甯王八剌失里在世祖九王傳汝甯王忽剌台陽翟王太平在三宗諸王傳又有駙馬孛羅帖木兒及乃馬歹乞赤紐澤蒙古塔失雅失帖木兒撒兒封溫阿剌帖木兒之屬其降者復有若不花欽察台之屬

乃馬歹泰定帝卽位爲右丞元年進平章政事御史董鵬南劉潛等上言乃馬歹黨附逆徒身虧臣節乞定其罪以銷天變不報三年兼知樞密院事遣簡閱邊兵致和元年敗於宜興大都將脫脫木兒禽而殺之

乞赤延祐六年以參議省事進參知政事英宗卽位罷爲集賢學

士秦定時爲太子詹事天順帝立及大都兵遇於宜興戰死

紐澤累官通政院使泰定帝立遷御史大夫元年以天變同御史大夫禿忽魯乞避位帝不許二年兼知樞密院事加開府儀同三司明年爲右御史大夫紐澤在泰定世恩禮最爲優渥天順帝立及右丞相蒼失帖木兒太尉不花平章政事買閭等以兵次榆林紐澤尋爲大都所虜遂見殺

蒙古塔失雅失帖木兒撒兒封溫阿剌帖木兒皆失其氏族仕履天順帝立蒙古塔失雅失帖木兒時爲平章政事撒兒封溫爲將作院使及駙馬孛羅帖木兒以兵入古北口爲燕鐵木兒敗於牛闌山被禽斬之大都中書遂言上都諸王大臣不思祖宗成憲惑於姦臣倒刺沙輒以兵犯京畿今孛羅帖木兒蒙古塔失等旣正典刑宜傳首四方以儆眾懷王從其言皆傳首焉阿剌帖木兒時

爲樞密副使及指揮使忽都帖木兒以兵會梁王王禪之師戰於紅橋俄爲大都兵追及於紫荆關見殺

不花不知其氏族蓋居於興和嘗及事世祖仁宗時遙授左丞相尋拜太尉泰定元年與平章政事卽烈矯制強醮寡婦被鞠詔以世祖舊臣原之御史言不花卽烈矯制亂法請正其罪帝不允天順帝立不花及右丞相荅失帖木兒駐師榆林尋皆降於大都仍領兵焉然不花惟事剽掠大擾居庸以北俄被盜殺於家興和路當盜罪死刑部議曰不花不道眾所聞知本路隱其剽掠獨以盜聞非法之平也文宗嘉其議命更正之

欽察台亦失其氏族累官知樞密院事英宗時中政使咬住希寵謀傾懷王欽察台性巧譎陰和之至治三年英宗以爲宣政院使嘗自傳旨署事中書奏論之天順時倒刺沙使之領兵征大都欽

察台實持兩端徘徊觀望倒刺沙覺而欲收之欽察台佞口善說
辭得釋遂奔大都以降是時文宗多行拊接又以其盛陳功德喜
焉卽命平章政事以御史大夫紐澤田宅賜之天祿二年復知樞
密院事尋仍平章政事兼度支監至順元年又兼領長甯卿尋爲
御史論罷籍其家欽察台卽盡他御史爲之言天祿初在上都與
闊闊出等謀執倒刺沙事泄同謀者皆死欽察台以出征獲免頃
臺疑而劾之不稱事情宜雪其枉帝卽從之明年欽察台以名園
爲獻命御史臺給贓罰鈔千錠酬其直尋命平章四川政事御史
張益等乃言欽察台昔與咬住造謀誣告脫歡察兒事連潛邸致
出居遠海及天祿初倒刺沙知其有異志欲治之又追言咬住之
謀以自解皇上卽位不念舊惡擢居中書自貽厥咎復致奪官籍
產今又釋宥使涖四川四川與雲南接境雲南未平而以反覆不

可信之人任其事非所以重邊圉也詔乃奪其制命金符竝妻子
禁錮廣東免籍其家仍詔御史凡僉人如欽察台者言之無隱久
之復寅緣入朝知樞密院事至正九年復平章政事薨

元伯都刺亦曰烏伯都刺亦回回人也父亦福的哈魯丁翰林學
士承旨贈大司徒吉國公諡忠簡元伯都刺累官至治書侍御史
武宗立命參知政事進左丞出行省事於陝西仁宗時召與諸老
臣議事尋爲右丞進平章政事改集賢大學士復平章政事英宗
初出平章甘肅政事徙江浙泰定帝立復入仍舊官元伯都刺與
倒刺沙皆籍西域元伯都刺厯事五朝倒刺沙以其習朝廷事倚
重之元伯都刺亦以倒刺沙承主眷交相市也先是回回人嘗鬻
寶貨於京師價不貲其異石名曰珊瑚估至鉅萬自成宗時有進獻
內府或未酬直而其時諸有過爲司憲奪官者亦多出其門下求

幹旋一日元伯都刺自禁中出至政事堂集宰執僚佐以詔草示左司都事宋本使讀之乃以星孛地震赦天下仍命中書酬累朝所獻各直竝擢用自英廟至今爲憲臺奪官者本爭曰今朝廷以災異加恩天下徒畏賈人憤怨耶此有司細故形之王言必貽笑天下司憲祗有罪者官世祖成憲也今上御位首詔法世祖今擢用之是廢前憲而反洋前詔也後復有邪佞賊穢者將治之耶置不問耶諸宰執皆歎息罷去元伯都刺竟不從其言明日遂宣詔宋本由是稱疾不出元伯都刺亦乞以疾解政不許致和元年倒刺沙從帝如上都元伯都刺居守俄而燕鐵木兒反卽以兵禽元伯都刺據大都以迎附懷王尋殺元伯都刺而爲詔指目爲姦臣又言凡回回種人不與其事者各安業勿懼以慰安之焉俄復命追理元伯都刺家貲其時爲燕鐵木兒所執者平章政事伯顏察

見左丞朵朵參知政事王士熙參議省事脫脫吳秉道侍御史鐵木哥邱世傑治書侍御史脫歡太子詹事王桓等凡十人皆閉諸獄懷王入大都鐵木哥與兀伯都刺俱死伯顏察兒朵朵王士熙等各流遠方籍其家尋命給還伯顏察兒家貲明年皆徵還放歸田里尋復起錄用伯顏察兒納速刺丁子賽典赤瞻思丁孫也事附瞻思丁傳王士熙王構子也事附構傳朵朵泰定元年自南臺中丞參知政事三年進左丞放還後至正時官陝西平章政事終中書平章政事吳秉道累官秘書卿泰定二年奉使宣撫京畿還朝致和元年命參議省事兼經筵官鐵木哥累官至山南廉訪使疏請削降鐵失所用驟升官爲小人所疾尋召爲侍御史史皆不具始末餘人竝失其事故不傳是時抗拒懷王被殺者復有河南平章政事曲烈右丞別鐵木兒參知政事脫李臺皆以河南平章

政事伯顏附懷王反不肯從同死其被執者則有馬合某初爲山東鹽運司判官泰定元年爲吏部尙書佩虎符奉卽位詔以諭安南明年參知湖廣政事奉使宣撫兩浙上疏劾廉訪使完者不花之罪尋進湖廣左丞懷王出自江陵湖廣宗藩及省僚皆降馬合某不肯附執之尋燕鐵木兒爲之請而釋之又有撒忒迷失者英宗卽位知樞密院事泰定元年命率衛士佐太師按難出行邊三年出爲嶺北平章政事懷王立以不附已與梁王王禪倒刺沙馬某沙紐澤也先帖木兒同日見殺當是時拒伯顏被竄者復有月魯帖木兒

月魯帖木兒卜領勒多禮伯臺氏曾祖貴裕事太祖管領怯憐口怯薛官祖合刺嗣其職父普蘭奚成宗時官中書右司郎中武宗以爲山北遼東道肅政廉訪使月魯帖木兒幼警穎與丞相合刺

合孫子同入國學合刺合孫欲用爲中書蒙古必闡赤輒辭問所欲曰欲爲御史耳人壯其志仁宗世拜監察御史巡按上都是時太師鐵木迭兒氣燄薰灼月魯帖木兒劾奏其受富民張弼賕六萬貫曲爲貸死帝怒碎太師印而賜月魯帖木兒鈔萬貫除兵部郎中歷殿中侍御史給侍中左侍儀同修起居注右司郎中一日帝御便殿顧近臣曰朕聞前世皆有太上皇今皇太子且長可居大位朕欲爲太上皇與若等游觀西山以終天年不亦樂乎御史中丞蠻子翰林學士明里董阿皆稱善月魯帖木兒獨起拜曰臣聞昔之所謂太上皇者若唐元宗宋徽宗皆當禍亂不得已而爲之者也陛下位天位以保萬世無彊之業前代虛名何足慕哉帝大然之仁宗崩鐵木迭兒復相欲誣月魯帖木兒以罪不得乃出爲山西鹽運副使丁外艱服除擢山南江北肅政廉訪使泰定初